

**Bernama Perlu Cetus Maklumat Kegemilangan Negara - Raja Muda Perlis**  
**Bernama**  
**20 Oktober, 2012**

KANGAR, 20 Okt (Bernama) -- Raja Muda Perlis, Tuanku Syed Faizuddin Putra Jamalullail mahu Pertubuhan Berita Nasional Malaysia (Bernama) menjadi pencetus maklumat mengenai pencapaian gemilang negara melalui kegiatan utamanya sebagai agensi media.

Menurut baginda, kegemilangan negara yang dilaporkan berterusan secara tepat dan bertanggungjawab akan meletakkan negara pada kedudukan yang sentiasa dihormati.

Bertitah pada majlis makan malam Kesatuan Pekerja-pekerja Bernama (KPPB) di Ocean Glow di sini Sabtu, baginda berharap agensi berita itu turut memberi keutamaan kepada laporan yang boleh membantu menggalakkan perpaduan, kasih-sayang, patriotisme, rasa bersyukur, prihatin, bertanggungjawab, semangat kekitaan dan mentaliti kelas pertama.

Tuanku Syed Faizuddin menyifatkan Bernama sebagai agensi media yang sentiasa komited dalam memberikan kupasan terbaik dalam bentuk penulisan berkaitan isu-isu terkini selain memberi liputan berita yang berkesan untuk masyarakat.

Baginda turut berharap Bernama sentiasa mencari jalan mempertingkatkan kualiti berita dari semasa ke semasa sejajar dengan peranannya sebagai penyedia berita tepat masa untuk media elektronik dan media cetak.

Raja Muda Perlis juga berharap Bernama sentiasa mengoptimunkan potensi dalam mentranformasikan ekonomi Malaysia ke arah peningkatan penggunaan teknologi maklumat dan komunikasi (ICT).

Sebelum itu, ketibaan baginda yang diiringi Raja Puan Muda Perlis Tuanku Hajah Lailatul Shahreen Akashah Khalil ke majlis itu disambut Pengerusi Bernama Datuk Abdul Rahman Sulaiman dan Pengurus Besar Bernama Datuk Hasnul Hassan.

Turut hadir pada majlis itu ialah Menteri Besar Perlis Datuk Seri Dr Md Isa Sabu dan Naib Canselor Universiti Malaysia Perlis (UniMAP) Prof Datuk Dr Kamarudin Hussin.

Majlis turut diserikan dengan persembahan bunga api yang dilancarkan ke arah laut.

Majlis itu diadakan sempena hari keluarga KPPB yang berlangsung di Tasoh Lake Resort & Retreat, Beseri.

Sempena hari keluarga yang disertai kira-kira 200 ahli dan anggota keluarga, KPPB turut menganjurkan lawatan ke ladang anggur di Sungai Batu Pahat, melawat masjid terapung Al Hussain di Kuala Perlis dan melawat pekan sempadan di Padang Besar.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=703574>